


**BAKURUBASANNI**  
 (nimero 12 songo)  
 Mali kono = Dōrome 300  
 Afinkikono = Dōrome 600  
 Jamana were = Dōrome 1000



Kunnafonisében bota kalo o kalo. BP: 24 Telefoni : 21-21-04. Bozola Bamako-Mali. San 28nan boko 337nan A songo : dōrome 15


Fewuruyekalo san 2000

## Minisiriw ka njemogokura

Ibarahima Bubakari KEYITA yefanga bila nténendon, feburuyekalo tile 14, san 2000; an'a ka minisiriw bëe lajelen. Mogo min bilala fangabulon njemogonona nola, o ye Mande Sidibe ye. Peresidan ye sariyaseben dō bo, ka Mande Sidibe sigi, taratodon, feburuyekalotile 15, san 2000. Mande Sidibe tun ye jamana njemaa ka laadilibaa kerenkerennenye, Kuluba. Soro dənbaga njana don. A ka kalan siratigew la, a ye cemance ləkoliso Terason Fuzeri ke, n'o be wele bi ko Asikiya Mohamedi. A ye sanfe dipilomuw soro san 1960 ni san 1965 Faransi o kɔ, a ye sanfe kalan dō ke

Iamerikenjamana kan, san 1974. A ye baara damine san 1965 Mali banki la. K'ata san 1967 la ka n'a bila san 1975 la, a ye baara kədijə seleke naani waribonba la, n'o ye «FMI» ye, fo ka t'a se san 1985 ma. K'adamine san 1985 fo ka t'a se san 1995 ma, a ye baara kə «BCEAO» la. A kera «BCEAO» njemogoye Bamako, san 1996. O kɔ, a kera jamanakuntigi laadibaga kerenkerennenye, fo ka na se a talima Mali minisiriw ka kuntigiya la, san 2000, feburuyekalo tile 15.

Mande Sidibe kera kojenabojekulu caman mogo ye, san 1995, san 1997 anisan 1998. Den duuru d'a bolo; a si



Mande Sidibe

be san 60 la. Mogo minnu y'a don, ka gëre a la, olu ko k'a ka kuma man ca; wa yélémisennin ka d'a ye.

## Mali gofrenaman kura sigira

San 2000, fewuruyekalo tile 21 su, yéléma donna Mali gofrenaman na. O siratige la, gofrenaman kura min sigira peresidan Alifa Umaru KONARE fe, an b'o minisiriw jir'aw la ani ka dō f'aw ye u ka baara nataw kan :

- **Mande SIDIBE :**  
Minisiriw ka njemogoye ni dorogonogonna minisiri.
- **Amédi Eli Madani JALO :**  
Cikeyoro ni Togoda Yiriwali minisiri
- **Sumayila SISE :**  
Cikéminenko ni jamana labenni ni duguw joli ni sigiyoro lakanani minisiri.
- **Modibo SIDIBE :**  
Jamana kokankow ni kokan malidenw ka minisiri
- **Sumeyili Bubeyi MAYIGA :**  
Larime ni sordasi korow ka minisiri
- **Mmu Jakite Fatumata NJAYI :**  
Hadamadenyako ni bolodijognonmako ni mogokorobaw ka minisiri

- **Musitafa DIKO :**  
Kalanko ni ladamuniko minisiri
- **Zeneralı Çekura DUNBIYA :**  
Jamanadenw lakanani ni jamana konona basigili minisiri
- **Adama KONE :**  
Denmisew ni farikolojenajekow minisiri
- **Mmu Asikofare Ulematu TANBURA:**  
Kunnafonikow minisiri
- **Mmu Jara Afusat CERO :**  
Muso ni den ni du yiriwaliko minisiri
- **Mmu Ture Alimata TARAWELE :**  
Iziniko ni jagoko ni taransiporokow minisiri
- **Usumani SI :**

Jamana ni maraw kono kono minisiri


- **Abudulayi Ogotenbeli PUJUGU :**  
Kiiriko minisiri
- **Mmu Tarawele Fatumata NAFO :**  
Keneyako minisiri
- **Bakari KONE :**  
Soro ni nafoloko minisiri
- **Mmu Zakiyyatu Waleti HALATINI :**  
Bololabaarako ni duguyaalako minisiri
- **Mmu Buware Fili SISOKO :**  
Fangaso soko ni dugukolo kojew minisiri
- **Abubakari KULUBALI :**  
Dugujukoro nafaw ni kuranko ni jiko minisiri
- **Makan Musa SISOKO :**  
Baarako ni baarakalan minisiri
- **Pasikali Baba KULUBALI :**  
Seko ni dənko minisiri

## Minisiri kuraw



**Sumeyilu Bubeyi Mayiga**

Larime ni sordasi koro ka minisiri. A bangera san 1954, zuwenkalo tile 8, Gwo. Kunnafonidila don. Sumeyilu Bubeyi Mayiga kera kunnafoniseben «Sunjata» sebennijekulu nemogo ye. Furancelafanga waati la, a kera jamana nemogo ka korsigi ye. K'a ta san 1992 la, ka n'a bila san 1993, a kera jamana kuntigi ka baarada nemogo ye. K'a ta san 1993 la, foka na s'a ka minisiya ma, a tun be fanga basigili ciyakeda nemogoya la. Aye furu ke; den duuru b'a bolo.



**Musitafa Diko**

Kalankow minisiri. A bangera awirilikalotile 4, san 1955, Duwanza. Lakolikaramogodon. Aye kalandenw kalan Seware cemance lakoliso la, san 1979 - san 1981, ani Buyagi cemance lakoliso la, san 1987-1988. San 1993, nowanburukalo la, k'a t'o sannalakoliso, «ENSUP» irisikan kalanni baarada la, a welela k'a ke cemance lako ni sanfelakoli, ani nininikow minisiri ye.

Foka na sebima, jamana ka lasigiden tun don Burukina. A furulen don.



**Cekura Dunbiya**


Lakanani ni jamanadenw kolosili minisiri. A bangera san 1944, Kola, Kumantu arondisiman na, Buguni serikili la.

Zenerali Cekura Dunbiya ye nemogoya caman ke sordasiya kadara kono. San 1991, a kera lakanani ni basigli minisiri ye. San 1994, a kera Gwo mara nemogo ye. Fo ka se bi ma, jamana nemogo ka laadilibaga kerenkerennen tun don sordasiya siratige la.




**Madamu Ture, Amata Tarawele**

Izinikow, jagokow, ani bolifenkow minisiri. A bangera nowanburukalo tile 14, san 1948, San. Kalanwbannen, Alimata ye baara ke yoro caman na, soro ni wariko siratige la. Aye kooritulu ciyakeda nemogoya ke. Fo ka se bi ma, sigaraeti ni alimetu dilanyoro nemogoya tun b'a bolo. A furulen don, den wooro b'a bolo.



**Usumani Si**

Jamana kononakow ni sigidaw minisiri. A bangera mekalo tile 25, san 1949, Banjagara. Atilalen kalan na, a ye baara ke senekow ni soro bolodali ciyakedaw la. Fo ka se bima, desantaralisazasenko nemogo tun don ani jamana nemogo ka laadilibaga kerenkerennen. Afurulen don; den saba b'a fe.



**Abudulayi Ogotenbeli Pujugu**

Sariyakow minisiri. A bangera san 1949, Manankoro, Buguni serikili la. A ye Kulukoro mara nemogoya ke. Fo ka se a ka minisiriya ma Sikaso mara nemogo tun don. A furulen don.



**Madamu Tarawele Fatumata Nafo**

A bangera nowanburukalo tile 10, san 1958, Ja, Tenenku, Mootimara la. Kalanw bannen a ye poroze caman ke, kenyako siratige la. Minisiriya ser'a mak'a todin seleke naani waribonba ka ciyakeda kenyako bolofara la. Afurulen don; den fila b'a bolo.



**Bakari Kone**


Nafolokow minisiri. A bangera san 1953, zanwiyekalo tile 21, Moti. A ka kalanw kofe, Bakari ye baara caman ke warikow siratige la. A ye jamana ka nafolokow ciyakeda nemogoya ke. A kera minisiri ye k'a to jamana warimarasoba nemogoya la. Afurulendon, dennaanib'a bolo.



**Madamu Zakiyatou Waleti Halatini**

Bololabaarako ni jamana kokorow duguyaala minisiri. A bangera setanburukalo tile 15, san 1956, Gundamu.

A ye baara ke jiko ni yeelenko ciyakeda la. A kera minisiri ye k'a poroze do la. A furulen don; den duurun b'a bolo.



**Madamu Buware Fili Sisoko**

Fanga ka yorokow ni dugukolokow minisiri. A bangera Dakaru utikalo tile 22, san 1955. Ka ta san 1993 ka n'a bila san 1994, duwaniyw ka nemogo dankan tun don. A kera minisiri ye ka soro fangaso ka kolosilikela tun don. A furulen don; cemannin fila b'a fe.



**Abubakari Kulubali**

Dugujukoro nafoloko ni jiko ni yeelenkow minisiri. A bangera san 1959 NPesoba, Kucala mara la. Politikiton «UDD» ka depite tun don bulonba la fo ka s'a ka minisiriya ma, a tun be minisiriso la min nesinnen don cemancekalan, sanfekalanni neininkiwma. Afurulen don; den duuru b'a bolo.



**Makan Musa Sisoko**

Baaraw n'u degeli kojew minisiri. A bangera zuwenkalo tile 7, san 1953, Bamako. Fili Dabo Sisoko moden don. A ka kalanw bannen, a ye bara caman ke Mali kono, fo ka taa se san 1992 ma; o san, a kera «Eri Afiriki» ka sariya kojew nenaboo ciyakeda nemaa ye, an'a labaarialijekulu sebenkow nenabobaga. + ne 4



**Pasikali Baba Kulubali**

Seko ni dɔnkow minisiri. A bangera san 1951, Joyila, Beleko a rɔndisiman ha. A yekalan camannibaara caman ke Bamako ani Dakaru, ka sɔrɔ ka na ke jamana nɛmɔgo ka laadilibaga ye seko ni dɔnkow siratige la, fangayelenna kɔfɛ. Kɔsa in na, jamana nɛmɔgo ka ciyakɛda nɛmɔgo tun don. Afurulen don; den duurub'a bolo.

## PERESIDAN ALIFA YE BAARA 19 KALIFA GOFERENAMAN KUNTIGI MANDE SIDIBE LA

- 1) - Ka danaya sabati jamanadenw ni fangabondaw ni nɔgɔn cɛ, ani ka baarasen don forobaciakɛdaw kɔrɔ.
- 2) - Ka wale kerekerennenw sigi senkan, walasa lakana ka sabati jamana kɔnɔ, sariya hukumu kɔnɔ.
- 3) - Ka sariya nɛnamaya ani ka danaya sabati sariyabondaw ni jamanadenw cɛ.
- 4) - Ka maracemaboli kɔnɛw kɔlɔsi.
- 5) - Ka dɔ fara danaya kan fanga ni jamanadenw ka kɔnɛw nɛnabɔbagaw cɛ.
- 6) - Ka fura sabatilenw sɔrɔ lakoliko geleyaw la, ani ka janto ke kalankow sabatili la san 10 kɔnɔ, n'o ye «PRODEC» ye.
- 7) - Ka sigikafɔ nɔgɔya politikitɔn ni nɔgɔn cɛ, ani ka san 2002 kalafiliw laben konuman.
- 8) - Ka faantanya ni kerefedɛn kɛlɛli bɔ a sira fe.
- 9) - Ka dɔgɔtɔrɔsow caya, k'ubarika.
- 10) - Ka yuruguyurugu kɛlɛ sariya ni basigi kɔnɔ.
- 11) - Ka sɔrɔkow barika ni ciyakɛdaw cayali ye, ni baaraw dili ye mɔgɔ caman ma, ani ka Mali sɔrɔko sinsin «UEMOA» ni «CEDEAO» kɔnɔ.
- 12) - Ka fɛrɛw siri walasa ka kalan ni baara sabati, kerekerennenya la denmisennin kunda.
- 13) - Ka warikow sabati, k'u walawalaw.
- 14) - Ka sɔrɔdabaw ni sɔrɔdamisɛnw taabolow kɔlɔsi konuman.
- 15) - Ka dinetaabolokura mansinkow sinsin jamana kɔnɔ.
- 16) - K'an ka jamana ni farafinjamanaw kala nɔgɔn na anik'an laminijamanaw n'anw furancɛw kɔnɛw tɔpɔtɔ.
- 17) - Ka danaya sabati an ka jamana ni diŋe seleke naani jamanaw ni nɔgɔn cɛ, sira bɛe lajɛlen na.
- 18) - Ka jantojamanadenwna, minnu bɛ kɔkɔn, an'u k'u dɛmɛ, u k'u joyɔrɔ fa jamana jɔli la.
- 19) - Ka jamanaden bɛe lajɛlen kunnafoni Mali kɔnɔ, an'a kɔkɔn, walasa u k'u fanga fara nɔgɔn kan, ka san 2002 ntolatanba labenw sabati.

## minisiri kuraw sugandili

Hakililajigin na, kabini san 2000, fewuruyekalo tile 14, jamanakuntigi Alifa Umaru KONARE ye Mande SIDIBE sugandi k'a bila Maliminisiriw nɛmɔgɔya la, Ibrahima Bubakari KEYITA nɔna. Nka malidenw ye dɔgɔkun kelen jijalen ke sanni Mande ISDIBE k'a baarakɛnɔgɔn minisiri kuraw sugandi.

Mɔgɔ faamuyalenw a kɔlɔsili la, o sumaya ju bora fɛn fiia la :

- Minisiri kuraw tali sumayara Mande SIDIBE fɛ, sabugofrenaman nɛmɔgo tun b'a fɛ fɔlɔ ka pariti politikiw bɛe kunben, k'a ka baarakɛcogo nɛf'u ye ani k'a nin'u fɛ u k'u fɛlaw jir'o kan.

Mande sagotun ye min y'osiratige la, o yejisuma keli ye politikimɔgɔw ka furukufurukuw ni fɔnɔgɔn kɔw kan sanni san 2002 peresidansigi cɛ.

- Goferenaman kura sigili sumaya kun filanan ye nɔgɔnfaamuyabaliya ye min tun bɛ minisiriw ka kuntigi ni politikitɔn fila ni nɔgɔn cɛ, olu ka mɔgɔ suganditaw hakekɔla, n'o ye «UDD» ni «PARENA» ye.

Ajirala kohami min bɛ Mande ISDIBE la, o ye mɔgɔw tali ye minisiriya la, minnu b'u ka baara dɔn fɔ k'a dɔnnakari. A y'a jira k'o te nɛ minisirisow hake dɔgɔyalí kɔ ani baarakela faamuyalenw sugandili,

hali ni politikimɔgɔw don. Mande ni «UDD» mɔgɔw ganna nɔgɔn na, nk'a ye joyɔrɔ kelen d'u ma, min kalifara Abubakari KULUBALI la. Kulubalikɛ kera jamana dugujukɔrɔ nafakow ni kuranko ni jiko minisiri ye.

Min ye «PARENA» ye, o nɛmɔgɔw tun bɛ joyɔrɔ fila de nɔfɛ goferenaman na. An bɛ se k'a fɔ ko sagajigije y'a ka mandiya de kɔrɔbɔ o yɔrɔ la, bawo ale de fɔlɔ ye bɛnkan ni bolodijɔnɔgɔnma ke «ADEMA» fɛ politiki sira kan. «PARENA» ni Mande SIDIBE ma bɛe min ke u ka fɔlen na, u y'u sen bɔ goferenaman na.

+ ne 5

An bë se ka min fo Mande SIDIBE ye, n'o mase fo la yere, o ye geleya minnu b'a ne nin waati kono. Malidenw dusu tijen don cogo min na politikiko ni soro ni hadamadenyakow la fo Mali goferenaman kuntigi kura k'u hakili sigi ni wale nenanaw ye.

O temenen ko, Alifa Umaru KONARE ye nogo bo fanga bilali la san 2002. O koro ye ko Mande SIDIBE ka kan ka do fara a ka cesirijala jijali kan, walasa san fila min b'an ni peresidankurasigi ce, baara nafamaw ka k'o kono, ka sira bee jeya politikitonw ni malidenw bee bolo.

Min be far'o kan, o ye peresidan Alifa ka weleda yesalon ka nesin surofenko ni yuruguyuruko keleli ma, min ma sira soro halisa, ni jamanadenw b'a fe ka tige a la, k'a jate kuma lankolon ye. An be don min na, i ko bi, Mande SIDIBE wajibiyalen don ka teme n'o bugolibere ye jamana juguw nöfe, n'a b'a fe malidenw ka d'a la, k'u tege fa a la.

Wöyo ni popapo min ker'a sigili la Ibarahima Bubakari KEYITA no na, o kera wale ye min ye Mali mankutu goya jamana konjan'akokan. Otuma, Mande SIDIBE ka kan k'a jira dije bee la ko kurutukurutuko m'ale sigi Mali goferenaman kunna.

Nka i n'a fo, Mande SIDIBE yere y'a jira cogo min baarada kow latem waatia nilbarahima Bubakari KEYITA ni nogon ce, ko kuntilenna ani haminanko kelen min b'a la, o ye malidenw ka netaa ni bongola ye. N'an y'a ka kalan ni dönniyabaw far'o kan jamana kojew nenanboli la, hakilisigi doonin be malidenw ye sanni baara ka se «a shekili-saba-siriye ma».

**Basiriki TURE.**

## A' y'a' janto ntönfagan na !

Waati do la Faransi arajosoba, «RFI» ye weleda ko kasaaraba do b'a fe ka ke Gavo mara la. Musa Sisoko, n'ale ye ntönfagakow nemogo ye, o ye kunnafoñi jonjon di koje in kan.

Musa y'a jira ko ntönfagan caman lajereken don Tinesako dugu kono, Kidali serikili la. O sababu bora «OCCALAV» ni «OICHA» la, n'olu tun ye ciyakeda ye, minnu nesinnen tun, don kono ni ntönw fagali ma.

Kuma be «Jelidirini» min kan, n'o y'a dama posoni ye, ale ye forow lakanali ciyakeda, «NSPU» ta ye. Tuma min na kolosi kera kofura in yeposoniye, ciyakeda in ye fura in lajere, k'a kolosi, k'a baarali kon jamana kan.

I n'a fo jamana tow tun y'a nini cogo min na, Mali ye deme nini lamerikenjamana ka demeliton «USAID» fe, walasa «Jelidirini» be se ka silatunun cogo min na. Nk'a waati ni koronfekel benna, san 1990-1996. Posoni in silatununni baaraw ma se ka ke.

Koronfekel senfe, Tinesako posonimayoro ma se ka lakan; banbaganciye jelidirini barikow sogoo k'u konofenw bon fan bee fe, dugu kono, ani kungo kono. Posoniji in donna dugukolo jukoro ni metere kelen ni ko ye; a ji donna hali kolen döw kono. Barikon

lankolonw tara mogoo döw fe, Gavo ni Kidali, K'u ke ka kolonw laben. Posoni tun be so min kono, o konw n'a fenetiriw karila, ka posoni labila fenenama tinelikew ni sanjiw n'u nogonnaw ye.

Nin walew kelen, wele bilala ja keleli ciyakeda, «CILSS» ni «FAO» ma, ka deme nini. Hali alimanw ka demeliton «GTZ» welela; nka ta ma bo, sisi ma bo. Forow lakanali ciyakeda sorola ka fecrew siri ka mogow ladonniya «jelidirini» baasiw la. O kera sababu ye tinesakokaw ka baganw mabo posoni marayoro la, ani ka so in konw n'a fenetiriw lafili.

Laadilikan kelen fo Ageloki dugumogow ye, Kidali serikili la, ani Yelimane dugu mogow, Kayi mara la sabu «Jelidirini» caman kamalila o duguw de kono, sanni jamanaw ka soro, minnu be se ka posoni in silatunun. Musa ka fo la, ntönfagan in laboli ka gelon jamana kono. A ka kan ka bo sira fila de fe : Kogoj ni sanfela. Sisan, fura kelen min b'a ko la, o ye mogow ladonniyalie «Jelidirini» masibaw la. A ka jugu kosébe, wa a te tije a yerema abada. Kunadiyayoro min b'a ko la, o y'a tulu cayali barisa mogoo faamuyalenw ya jira ko tulu b'a baga faga doonin.

**G.A. Diko  
Badama Dukure**

## San 1999-2000 suman sorotaw

Jamana ka ciyakeda min nesinnen don jatemine ma, o ni senekelaw demeniciyakeda y'a jira kosan 1999-20000 suman sorotaw be ben toni 2.961.634 ma. Suman suguya bee lajelen b'o la.

Ciyakeda ninnu ka fo la, kemesara la, ninan sorow ka ca salon taw ye ni 16 ye. Salon taw benna toni 2.546.906 ma. Ton 255.520 yelenne ninan suman sorolenw kan. Olu la, now n'a nogonnaw ye toni 197.130 ye; malo ye toni 52.880 ye; alikaama ni orizi ye toni 5.500 ye.

Ni mogoo min ye nin jatemine, a be se ka fo ko jigisigi be baloko ta fan na, kerékerénenya la koronfela la. Sabu do farala balo bee lajelen kelen-kelen hake kan. kemesarada la, 13 farala

malo kan, 11 farala kaba kan, 17 farala sajo kan, 19 farala keninge kan, 122 farala alikaama kan.

Segu mara ye bee dan; o ka suman suguya bee faralen nogon kan, o benna toni 844.858 ma. Sikaso b'o kan, ni toni 616.047 ye. Moti ye sabanan ye ni toni 534.674 ye.

A jirala ko mogoo kelen ka san kelen dunta be ben kilo 43 ni ko ma malo la. Suman tow la, a be ben kilo 155 ni ko ma. Jamanaden hake be ben miliyon 10 ani ko ma sisan. Jateminsla ninnu y'a jira ko nemaaw ka kan k'u janto dugubakonmogow nitogodalaramogow la, sanji ye tijeliw ke minnu kun, k'a sababu ke geleyaw n'u cogoyaw ye.

**Moriba Kulubali  
Badama Dukure**

Nin ye san jateseben suguya do ye mia b'a to mogo be se ka walew  
ke don nini. A be tali ke k'a damine san 1857 fo san 2036.

							zanwuye	faburuyé	marisi	awili	mekalo	zuwen	zuluye	utikalo	setanburu	ekutuburu	nowanburu	desanburu	A SO	B SO	dow
1857	1885	*	1925	1953	1981	2009	4	0	0	3	5	1	3	6	2	4	0	2	1	*	Kari
1858	1886	*	1926	1954	1982	2010	5	1	1	4	6	2	4	0	3	5	1	3	2	*	nten.
1859	1887	*	1927	1955	1983	2011	6	2	2	5	0	3	5	1	4	6	2	4	3	*	Tara
1860	1888	*	1928	1956	1984	2012	0	3	4	0	2	5	0	3	6	1	4	6	4	*	arab
1861	1889	1901	1929	1957	1985	2013	2	5	5	1	3	6	1	4	0	2	5	0	5	*	alam
1862	1890	1902	1930	1958	1986	2014	3	6	6	2	4	0	2	5	1	3	6	1	6	*	jum.
1863	1891	1903	1931	1959	1987	2015	4	0	0	3	5	1	3	6	2	4	0	2	7	*	sibi
1864	1892	1904	1932	1960	1988	2016	5	1	2	5	0	3	5	1	4	6	2	4	8	29	kari
1865	1893	1905	1933	1961	1989	2017	0	3	3	6	1	4	6	2	5	0	3	5	9	30	nten
1866	1894	1906	1934	1962	1990	2018	1	4	4	0	2	6	0	3	6	4	4	6	10	31	tara
1867	1895	1967	1935	1963	1991	2019	2	5	5	1	3	6	1	4	0	2	5	0	11	32	arab
1868	1896	1908	1936	1964	1992	2020	3	6	0	3	5	1	3	6	2	4	0	2	12	33	alam
1869	1897	1909	1937	1965	1993	2021	5	1	1	4	6	2	4	0	3	5	1	3	13	34	jum.
1870	1898	1910	1938	1966	1994	2022	6	2	2	5	0	3	5	1	4	6	2	4	14	35	sibi
1871	1899	1911	1939	1967	1995	2023	0	3	3	6	1	4	6	2	5	0	3	5	15	36	kari
1872	*	1912	1940	1968	1996	2024	1	4	5	1	3	6	1	4	0	2	5	0	16	37	nten
1873	*	1913	1941	1969	1997	2025	3	6	6	2	4	0	2	5	1	3	6	1	17	*	tara
1874	*	1914	1942	1970	1998	2026	4	0	0	3	5	1	3	6	2	4	0	2	18	*	arab.
1875	*	1915	1943	1971	1999	2027	5	1	1	4	6	2	4	0	3	5	1	3	19	*	alam.
1876	*	1916	1944	1972	2000	2028	6	2	3	6	1	4	6	2	5	0	3	5	20	*	juma
1877	1900	1917	1945	1973	2001	2029	1	4	4	0	2	5	0	3	6	1	4	6	21	*	sibiri
1878	*	1918	1946	1974	2002	2030	2	5	5	1	3	1	3	6	1	0	2	5	22	*	kari
1879	*	1919	1947	1975	2003	2031	3	6	6	2	4	0	2	5	1	3	6	1	23	*	ntene
1880	*	1920	1948	1976	2004	2032	4	0	1	4	6	2	4	0	3	5	1	3	24	*	tara
1881	*	1921	1949	1977	2005	2033	6	2	2	5	0	3	5	1	4	6	2	4	25	*	arab.
1882	*	1922	1950	1978	2006	2034	0	3	3	6	1	4	6	2	5	0	3	5	26	*	alam.
1883	*	1923	1951	1979	2007	2035	1	4	4	0	2	5	0	3	6	1	4	6	27	*	juma
1884	*	1924	1952	1980	2008	2036	2	5	6	2	4	0	2	5	1	3	6	1	28	*	sibiri

#### Misali dow file nin ye

I Walew kedon nini go : N'i b'a fe ka wale do kedon nini dogokun dow na.

1°) Numanfe sow laj., i ka wale in kesan be soro yen. 2°) I be wale in ke kalo fana nini kalow ka so la. 3°) Wale in kesan so, ani a kekalo so be nogon kuriben jateden do kan kalow ka so do kono; 4°) I be o jateden fara wale in kedon tile hake kan, min be ben jateden were ma. 5°) I be soro ka o jateden nini "A" so walima "B" so kono. 6°) I ka don ninita sebennen file i kini fe.

#### II Misali damadow :

An y'a don ko Mali y'a ka yere mahoronya soro san 1960 setanburukalo tile 22 de la. N'an b'a fe ka dogokun don yere don, an be :

1°) San 1960 nini numanfe sow la. 2°) Setanburukalo fana nini kalow ka sow la. 3°) San 1960 ani setanburukalo be nogon kun ben yoro min na 4 be yen. 4°) An be tila ka (4 + 22 = 26). 5°) An be soro ka 26 nini "A" so wali "B" so kono. 6°) Alamisa sebennen file an kini fe. O don de kera san 1960 setanburukalo tile 22 ye.

III An ka je ka san 2000 setanburukalo tile 22 don nini : San 2000 so ani setanburukalo so be nogon kunben jateden 5 kan.

An ka 5 + 22 = 27 an ka 27 nini "A" so kono walima "B" so kono. Jumadon sebennen file 27 kinin fe. San 2000 setanburukalo tile 22 be ben jumadon de'ma.

Burama Sidibe-Sirakorola "C.A.R"  
Balukukalankaramogo Kulukoro mara

## Nininkali

Jamana minnu delila ka kupudafiriki ta, olu fôra kibaru boko 336 nan kono. Ne ma min faamu, o file. Ne hakili la, san fila de be kupudafirikiw ni nogon ce. Nka ne y'a kolosi ko san kelen be dow ni nogon ce, i n'a fo san 1962, Ecopi, ani san 1963 Gana. O sorola cogodi ?

O kofe, Gana ka tako filanan, san 1965, ani Kongo Zayiri ka tako folo ce, san 1968, san saba b'olu ni nogon ce. O sorola cogodi?

Lala Mamadu Jakite  
Bozola Bamako.

## JAABI

Kibaru nemogoyaso be Lala Mamadu Jakite ladonnia ko Madu Jara ka fo la, n'ale ye ntolatankow nedonbaga nana ye «Lesori» la, san 1962 - 1963 kupudafiriki tanna san laban na, n'o ye nowanburukalo ni desanburukalo ye. O be ben san kelen ma. N'i ye san 1965 ta fana laje, o tanna nowanburukalo la; san saba b'o ni 1968 kupudafiriki tanni ce. O la k'a damine san 1962-1963 la, ka n'a bila 1965-1968, o be ben san naani de ma; kupudafiriki ye tankofila de ke nin san naani kono.

Walasa nagami kana don kupudafiriki tanni waatiw la, a tanni dabilala san laban na. K'a damine san 1968 la, ka n'a bila ninan na, kupudafiriki be tan san damine la. Zanwiye kalo ni feburuyekalo ninnu na.

## Jamanadenw ni sariyaw

A fôra ko mara seginna so, utikalo kibaru kono. Desantaralizason koje caman nefora. Nka, ne ma se ka min faamu, o ye mériw sigili ye kominiw kunna.

Olu si te jamana taabolo sariyaw don, walima kominiw te jamana sariya hukumu kono, bawo malidenw ka ca, minnu te jamana sariyaw yere don.

Hamadu Aturu Boli  
Danbanna Kita.

## An b'a fe k'an ka folo maabaw ka kow don

Ne b'a jini «Kibaru» fe, an ka folo waliju minnu temenna, n'olu do ye kankun Musa ye, a ka gafe dilan u kan, walasa balikukalannaw be se ka kunnafoni sorô u kan, sabu kuma caman be fu kan. N'u ma seben, caman te faamuya.

An y'a men ko Kankun Musa y'an ka jamana sanu be ta, ka taa wali jamana kan, i n'a fo lakolidenw b'a kalan cogo min na. O tuma «Kibaru» yere k'a laje, anw fana ka sek'okalan an ka gafe kono cogo min na.

Yaya Mariko  
Kalanbankoro - Bamako

## Sugujomobiliw ka dantemewale

Ne ye fen kelen kolosi sugujolaw fe, o ye ne kamanagan. N'i ye sugujolaw jatemine, u be doni ke ka mobili fa, ka laban k'u sigi sanfe; hali sigiyoroko be geleya.

Nin wale jugu in be ke jamana kono don o don, faamaw te fen fo. Ne b'a jini jamana faamaw fe, u ka dansigi nin wale jugu in na.

Dirisa Togola Balikukalankaramogo  
Bonwu - Banko - Joyila

## Kojugubee lajelen nesinnen don senekelaw ma

Kumajuman kelen fokotan ka fisa ni kumasintan foli ye. Min ye koeriko ye, halibi anw kamanagannen don a ko la. N'a kotun te ne nin kô, a tun ka kan ka suda senekelaw la.

An kelen ka nogow, furajiw, ani senekemine tow ce juru la, usorola k'a fo ko koeri binna. O kera geleyaba ye anw senekelaw bolo ninan. Ni do ma bo nogow ni furajiw songo la, hake si te senekelaw ka geleya la.

N'a fôra ko senekela ye Mali ntuloma ye, ne ma son o ma, bawo an fe Mali kono yan, kojuguman bee be ta ka nesin senekelaw ma.

Burama Jalo balikukalanden  
Djenné - Néne - Sikasso

## Senekelaw te ka jate Mali kono

Sené nafa be ka dogoya senekelaw bolo, sabu an ka netasira bee be ka geren an ne. N'an ye tiga sené san o san, julaw b'o bin; hal'an ka denbaya musakaw tilance te sorô o la, ka mago were ne.

So min be mogo bin, it'o tulo fila ye. O kera ninan koerisene ye, san 1999. N'i y'a jatemine, goferenaman cesirilen te senekelaw ka netaa la; a be fo da la, nka a te waley.

Ni min kera, o de be fo. Deme caman be na Mali la, kok'a di senekelaw ma. Nka, o deme tilako naani na, senekelaw ta te teme tilance kan. Goferenaman ni julaw bolo be nogon bolo ka teme senekelaw kan. Senekelaw tolen be ko Mali kono, i ko sentonto.

An ka deme te d'an ma, k'an te fen don, k'an te kalama, k'an ye binkonombogow ye. Ayiwa ! O t'an no ye; o ye Ala no ye. Ala mana min ke, o wasara. Tine don, anw be senekelaw ka fenw sorô; nka k'u bo fen na, o ye goferenaman no ye. Hali n'itilenna ka den ta, wulafe n'i y'a sam'a ton kan, o de be to a kono; tali te to a kono.

N te san 2000 kono kono don folo. Nafa ma ye ninan koerisene na. Do farala senekelaw ka dinelatige geleyaw kan ninan. Ni goferenaman ma wuli ka jo, ka senekelaw deme, a ma nénabô folo!

Mogow be yen bi, dali b'u ye, nka sunogo t'u ye. An te deme sorô; an be fen minnu sené, an te wari sorô olu la.

Kolankoro Faransuwa Jara  
Jalan - Kolokani.

## Npogotigiw ka tungafetaako

Beledugu npogotigiw ka tungafetaa bilama kelen be ka musocew caman dusukasi. Sabu, buranke be ci bila k'i muso be taa bo a faso la, nka ni muso segintuma sera, i b'a men ko muso taara Bamako.

Nidenmansaw m'a laje ka npogotigiw ka taamako nogoya, a meen o meen, npogotigiw mamineli be dabila.

Andere Kane  
Tilekaji Kolokani

## Mara banakise silatununni baaraw be senna dögötöro kunda

Dijé keneyakow tigilamogó minnu be «OMS» ka bolo kan, olu y'a jira ko mara ye bana ye, min banakise be sorokojidörön dela. Ukon'obanakise kögöra hadamaden farikolo la, a b'a ne fiyen. O de kōson-u y'o fiyentoya wele ko kōjilafiyentoya, ka masorökōji de y'a sababu ye. Ni kō te dugu min kōno, marako n'a banakiseko an'a fiyentoyako jore t'o dugumogow la. U y'a jira ko fen min y'a banakise ye, o be se ka san 9 fo san 14 ke hadamaden farikolo la ka sora ma sa. A banakise kelen kelen bee be bange fen neñamanin do miliyon caman na siñe kelen, minnu be wele kosimili. Olude be yereke hadamaden farikolo la. Ni minnu donna hadamaden farisogon'a woloniñogon ce, k'o k'u dagayoro ye, olu de be ke sababu ye ka naja bila o tigilamogó la. N'o kera, o ye shiyenni dabolen ye, ka masor'a tigi farikolo yoro bee be ke kuruw ye, minnu dimi madali te ne shiyenni banbalikó. Ni mara ye mogó min mine nin cogo la, o tigi ye baara soro, ka d'a kan, tuma bee, a be shiyenni na, hali maloya t'a la. Ni minnu donna hadamaden ne kono, k'o k'u dagayoro ye, olu de be ke sababu ye ka bugun da o tigi new la döönin döönin. N'o kera, a tigi new laban be fiyen ka soro bana taamashiyen fosi t'u la. Ni mara ye mogó min new fiyen nin cogo la, o tigi be ke kabakolamogó ye, ka d'a kan, mogó si t'a nekisew ye, olu jelen an'u cekani cogo min na, ka d'a la, k'a te yeli ke. Ni minnu ma doncogo soro hadamaden wolo kōròla la, wali u new konona la, olu de be mogow kin, i n'a fo sosow b'a ke cogo min na, k'a bana kofolen fila do la kelen bila u la, n'o ye farineye ani nefiyen ye. U ka jugu mogó minnu ma, o ye kodalabaarakelaw ye, i n'a fo jegeminelaw, nakoselaw, bagangennaw, finikolaw n'u nogonna minenkolaw anijitala gansanw. Ob'a

jira ko ni mogó min sigiyoro benna dugu ma, kō be min kono, n'o te marafurata, omankank'a sennacaya koda la. Keneyakow tigilamogow y'a fo k'u ye jatemine min ke mara kan, o y'a jira k'a banakise be mogó lakodönnen minnu na dijé kono, cew ni musow ani denmisenninw, o ye mogó miliyon 18 de ye. U ko k'o mogow be bo jamana 37 de kono; bee be Afiriki ani Ameriki Latinidugukolowan, fo n'a kera jamana kelen dörön ye, min be Arabula dugukolo kan, n'o ye Yemenijamana ye. U soro la k'a fo kon'i ye dijé maratow bee fara nogon kan, k'u ke keme kulu caman ye, ko n'i y'o keme kulu kelen fen o fen ta, i b'a soro olu la, mogó 99 be bo Afiriki jamanaw kono, n'o ye farafinna ye (99%). U y'a jira ko mara kera sababu ye ka mogó minnu ne fiyen dijé kono, k'olu jate minelen cayara ni mogó miliyon kelen ye. O siratige la, u y'a fo ko mara be mogó 40.000 nogonna de

ne fiyen san o san dijé bee kono. Fen min ye mara keleliko ye, u y'a fo ko keleccogo fila de b'a la. A fofo ye koji labanakisew fagali ye ni fura ye, min be kōjiv saniya. Ajirala k'o fura songo ka gelén cogo o cogo, a baara ne ka misen cogo o cogo, kōjiv be ka furake n'a ye Afiriki kōnokabini sn 1974 la. A filanan yebanabagatow farikololabanakisew fagali ye ni fura suguya wére ye, u furakeli daminená ni min ye yoro bee la kabini san 1987 la. U y'a fo ko walasa o fura ka mago ne, ka bana kelle kōnuman k'a ban pewu, fo banabagatok'ata siñe kelen san kono, ka tugu o tacogo la san caman kono. U y'a jira ko mara keleli baara be senna cogo min na, a ye sira soro cogo min na, ni balan ma don a la, u hakili la, a be silatunun yoro bee la ka ben san 2010 ma.

"OMS"  
Amadu G. Kante

## «OMS» ka korofow keneyka kan

Dijé seleke naani tonba min jesinnen don keneyakow ma, n'o ye «OMS» ye, o y'a jira ko n'i ye dijekonómogow bee lajelen keme-keme sigi, i b'a soro mugan ye desebaato lakikaw ye.

Dijekonómogow be ben miliyari kelen ni miliyon saba ma. O mogó mugan ninnu ka san soro ta te se sefa keme ni mugan ma.

Desebaato ya te tali ke soro dörön na; a kolo ka bon kosebe keneyka siratige la. Mogó caman be sa, sann'u ka san duuru soro.

N'i ye sahelijamanaw ta, desebaato ka ca olu minnu kono kosebe, i b'a soro muso tan ni fila o

tan ni fila, muso kelen sata be ke konobara ye olu la. K'a soro farajew jamanaw kono, a te teme muso kelen kan, baa naani cela. A sabatira fana ko dumunifénw be kasaara caman lase mogow ma. N'i ye farajew keme-keme sigi, dumunifénw be banaw lase mogó bisaba dörön ma. Sentanjamanaw la, ni Shini bor'a la, kono boli be mogó miliyari 2 ni miliyon 7 miné san o san; a be denmisennin miliyon 2 ni ko faga, minnu si ma se san duuru ma. San o san, do be fara bana soro siraw kan ka t'a fe.

"OMS"  
Badama Dukure

# «Turutoko» kera baara ye

Kabini san 2000, zanwiyekalo la, Mali koori tulubo izini, «Ikoma» y'a naniya ka bagandumuni «turuto» feereli ke kenekanfeere ye kenyereye magobatigiy ni nogon ce.

A jirala o kadara kono, ko «turuto» toni kelen songo be bo sefawari 7500 la k'a ke sefawari 12500 ye.

O kibaruya balala baganmaralaw la folo, o ko a ker'u bolo jorenanko ye, bawo kasabi min yelenna songo koro kan, uy'a ye k'olaban bena ke sababu ye ka do fara sogo ni nono songow kan. O temenen ko, bagandumuni koorikololama neciba b'olu baganmarala minnu ye, olu ta bena k'a la dumuni doron ye. U bolo kora ka bo a tilali la pewu.

«Ikoma» y'a jira k'a ma naniya in t'a kunfe. A folo, a y'a nini ka yelema don a ka bagandumuni tilaliko la. A ye segesegeli do ke san 1998, awirilikalo la, min y'a jeya ko bagandumuni «turuto» sannifeere te ke konuman. Yelema in kun do y'o ye.

Turuto feereta tilalibolo yelemara sije caman san 1986 ni san 1992 ce. Koroen bagandumuni koorikololama feereta tilako 100 sigiyoroma 50 detun be labila Mali koorisene ciyakeda «SEMUDETE» ye, ka 40 di Mali cikelaw ka konenaboso ma, «Ikoma» yere ta ye 6 ye; a to 4 tun be di cikayorow demeni seriusida «DNAMR» ma.

A jirala k'o tilacogo krotun ye yurugu-yurugu ani nanbarakobaw ye. O de y'a to Mali minisiriso min ka baara nesinnen don iziniko ni jagoko ni bololabaarako ma, ni «Ikoma» b'o ka mara kono, o y'a nini koorikolo tulubo izini fe, a ka dosen kura ta «turuto» sannifeere n'a tilalicogo la jelenya na, bee lajelen ka nafa sira kan.

O waati kelen na, do farala koorikolo songokan, k'a kilo kelen bo dorome 2 ni tama la, k'a ke dorome 4 ye. O b'i n'a fo kun ni kun. Mali koorisene ciyakeda y'o dofarankan minke, o ye fen ye, min ka kan ka Ikoma wajibya ka do fara

safune nitulunibagandumuni «turuto» songow kan, bawo olu bee be dilan ni koorikolo de ye.

Nka Mali koorikolo tulubo izini y'a nesin turuto de folo ma, ka tulu ni safune to yen. U y'o ke ka da min kan, o ye Mali n'a kerefe jamana minnu jelen don warikelen na ton kono, n'o be wele ko «UEMOA», o jamanaw ye duwaje dagawwulili minke ka bouni nogon ce danfaraw la, jagofenw soroli kama nogoya la. «Ikoma» y'a jatemine ko kokan tulu ni safune ben'u taw sanga bin, o de koson u ma fen far'olu songo

ka sariyaw bee latilen, ka wusuruw bee sara.

A jirala ko kenekanfeere kadara kono, kenyereye fila minnu be tugu magobatigi jagokela folo la, feere be latige Ikoma ni min ce k'o sababu k'a ka fota cayali ye ni tow ta ye, turuto hakke feereta tilako 100 sigiyoroya 30 ni 20 be di olu nokan mogo fila ma. Ikoma ka nin waleya be ka lagosi kosebe, bawo a jirala k'a ma bagandumuni minfen kerenkerennen ye, min ni jagofen tow te kelen ye, n'a joyoro ka bon jamana soro



kan folo. An ka baganmaralaw te taa min ko, n'o ye «turuto» ye, «Ikoma» y'o songo de danteme yelen. O songo layelenni tun te taa kenekanfeere ko, walasa ka dansigi turutoko yurugu-yurugu la, a kana ke baganmaralaw bolo dusukasikoye. «Ikoma» ye klosili minke, yurugu-yurugulaw ka tono tun ye kun ni kun ye turuto feereli la. O tono kasabi be t'i jo fo sefawari miliyari 2 ni 3 la. A jirala k'o ye boneba ye izini nibaganmaralawnicikelaw bee lajelen bolo.

«Ikoma» yere ka foli la, kenekanfeere in be soroko kenyereye mogo lakodonnenw deme ka turuto soro jelenya na kene kan, walasa ka t'a feere u sago la, u kelen ko ka fangaso

walanwalanni na. A b'i n'a fo u ye do fara koorikolo gansan de songo kan. Wele in ye kerefekumaw ni dugudugukumaw caya turuto jagomanfilaw niwayisogofagalaw ni baganfeerelaw ni baganmaralaw ni nogon ce. Cikelaw ka tonba konenaboso «APCAM» fana ma jen ni turuto songo layelenni ye. Bagandumuni jagomanfila lakodonnen do, min ye san 20 ni k'o baara la, n'a togo ko Mahamadu DARAME, o y'a jira ko «Ikoma» y'i bolongo bila olu ka baara silatununni siben de la ni goferenaman ka yamaruya ye.

Mahamadu ko turutoko damine na, Mali koorisene ciyakeda «SEMUDETE» tun be koorikolo min

+ ne 10

(N° 9 to)

feere olu ma, u tun be nigisinagasa ni timinandiya sugu bee ke k'o feere baganmaralaw ma. A k'a ka ca ni san 10 ye bagandumuni turuto toni kelen tun be feere sefawari 2575 la. San 1998, a kera dorome 7000 ye. San 1999, dorome 500 faral'a kan, k'a ke sefawari 7500 ye. Nka kabinisan 2000, zanwiyekalo, bagandumunituruto toni kelen songo sera sefawari 12500 ma. Mahamadu DARAME yekangarigelen da «Ikoma» ni goferenaman ye jagomanfilaw bee togo la. A y'a jira ko n'u ma seginko, jagokelaw bena t'uka turuto san Burukina Faso, min da ka di, ka n'a feere Mali la, wałasa ka «Ikoma» ka bagandumuni gal'a bolo. Baganjagolaw fana ye jalaki bin fangaso kan, ka d'a kan turuto songo ma yelen a ninema, w'a jenna n'a ye. A dun dogolen te mogosi la, ko wale don min bena do fara jamanadenw ka geleya kan, bawo a be ke sababu ye k'olu wajibya u ka do fara baganw songo kan. A kolsira ka ban, ko bagansannaw be ka dgoya garabaliw la. Wayi sogofeerela minnu be Dibida la, olu fana y'u kali ko fura t'a la, do bena fara sogo songo kan, bawo bagantigw bena turuto songo da u ka banga feeretawkan. Wayiw k'okosebe ye, k'a masoro, an file yoro min na, geleyaba b'ukan k'a bansogosongoko la. Ni do faral'o kan, u t'a don bilen, u be min ke.

Bamako wayiw ka sendika kolabenna Alimami SISE y'an ladonniya ko folo ale tun be se ka misisogo kilo 200 feere sanni midi ce. Nka bi, o hake kelen be tila -tila u caman ni nogon ce; wa mogo minnu be se k'u ta bee feere tile kono, o hake ka dgo. Alimami k'olu te geleya fe, bawo geleya da man di mogosi la.

Bagan ni sogo feereli konenaboso ciyakeda jelenw ka tonba peresidan Erene ALIFONSI fana seginna Dibida wayiw ka folen kan, cogoya were la. Ale ko «Ikoma» ni fangaso b'a fe ka baganmarako silatunun anka jamana kono. Ay'a kakumakan sonjila, k'a jira ko Mali la «Ikoma» doron de

yamaruyalen don ka koorikolo san cikelaw bolo, k'a soro Burukina Faso kono, izini saba de be yen minnu be nogondan na cikelaw ka koorikolo sanniko la. Koorikolo sannifeere labilalen don yen. Gerende foyi te kooriseneaw kan u wosiji dondalali la. ALIFONSI ko tugun ko «Ikoma» be jamana koorikolo bee ce ka taa n'a ye, k'a soro a te se k'a bee bayelema k'a ke turuto ye. O koorikolo tow be toli sanji la u bolo yen. A y'o sementiya ni koorikolo tolilen hake do sanniseben ye, a ye min san Kulukoro izini na. Erene ALIFONSI tilala tugun ka turuto toni 20 sanniseben jira jama la, a ye min wari sara cikelaw ka yiriwali banki «BNDA» la kabini san 1999, okutoburukalo tile 26, nka hali an file yoro min na, a ne ma d'a ka turuto sannen kan. A ko ni «Ikoma» te se ka mogow mago ne, k'u sago d'u ma turutokola, a k'a yere ka baarakcogo ni warilabaaracogo yelema. N'o te a faamuya ka gelon cogo min na Misi kelen latololen kalo saba kono, o songo ka ke sefawari 10800 ye Mali la, k'a soro, o misi kelen lamaralen cogoya kelen na, waati kelen kono, o songo te teme sefawari 3200 kan Burukina Faso baganmaralaw bolo.

Cikelaw ka tonba konenaboso «APCAM» sekereteri zenerali Hame KEYITA y'a jira ko jore min be ALIFONSI la, o jore kelen b'ale la «Ikoma» ka nin baara in na. Hame ka jate la koorikolo songo layelenni no tun ka kan ka ye tulu ni safune songo la. Nka bogeo ka fegen yoro min na, n'o ye bagandumuni turuto ye, «Ikoma» ye koorikolo geleya bee d'o kun, bawo turuto te dilan ni dowerye koorikolo ko. Hame ka foli la, geleya o geleya mana bo bagandumuniko la, o te taa ka baganmarala dan. Otuma, n'any'a lajeji nemajolenna, a b'in'a fo «Ikoma» b'a fe ka Malibaganmaralaw ka segen ke fu ye an kerefje jamanaw sugufiyew kan. Feere kunye, i ka do soro i ka wari bolen kan, nka n'a fora k'i ye wari min don i ka baganw ladonni baaraw dafé, hal'i t'o jaga soro, i ka kan k'i yere lafiya.

Hame KEYITA y'a jira ko turuto songoko bena fine don baganmara la jamana sahelyanfan mogow bolo, olu minnu te baara were don baganmara ko. Ikoma ka naniya sirilen in b'olu ni cikela misenninw bee sen bo bagandumuni soro la, bawo a warit'u bolo. Hame KEYITA ye jama hakili da kurutu-kurutu suguyaw bee keli la turuto nonabilaw ninini na baganmaralaw fe. A ko n'an m'an kolsi, farinimugu min dilannen don ni bagansogo ye, k'a ke bagandumuni ye farajela, n'a be ka fabilen wuli tubabuw ka misiw la, o farinimugu bena jenjen an ka jamana kono soonin, in'a foduguma furafeerelawta cogoya la. Anka dugawuke Ala k'an kisi oma. Hame KEYITA ko tuguni ko baganmara cogoya kura min be k'an ka sokono misiw siw laje, turutoko geleya ben'o baaraw bee lasegin ko, bawo turuto joyoro ka bon o bagan masinaw baloli la.

Hame k'ale ma min faamuya, an ka minisiriso min ka baara nesinnen don iziniko ni jagoko ni bololabaarako ma, o y'a bolo di Lamerikenw ka soro demejekulu «US-AID» ma san 1999, okutoburukalo temenen ka turutoko geleya jatemine «Ikoma» la. U ka segesegeli y'a jira ko turuto feereli geleya yoro ka ca Mali koori tulubo izini na. U ben'n'a kan ko fen kelen min be se ka turuto feereli bila bolo numan kan, o ye koorikolo feereli labilali ye kenyereyew ni nogon ce sugu la. O la, fen fila don, ni «Ikoma» ma se ka tonke, a be bin. Hame KEYITA k'ale ma se k'a faamuya, mun na, o benkan ma se ka waley.

Ale Hame bolo, «Ikoma» ka turuto labaarali n'a feerelicogo de man ni. A dalen don a la ko ni yelema ma don o baarakcogo la, turuto songo yelenni te foyi ne a la. Nege tigeyoro ye fanda ye. Ni turutoko ne ma nini «Ikoma» yere kono na fo ka bere da sanga ni waati bee cikelaw kun, fura ten'a sora la abada. Ni bee y'ijoi joyoro la, a ka c'a la, a tineni be dgoya.

**Moriba KULUBALI  
Basiriki TURE**

# San 2000 «kupudafiriki» kuncera wasa kono

K'a damine san 2000, zanwiye kalo tile 22 la, ka t'a bila fewuruyekalo tile 13 la, Afiriki ntolatanna dankorobaw ye nōgōn soro «KUPUDAFIRIKI» kene kan Gana ni Nizeriya jamanaw kono. Nink'er'a siñéfóloye «KUPUDAFIRIKI» ntolatanw ka ke jamana fila kono nōgōnfe. Farafinna ntolaci tulonba in min be laben san fila o san fila, a kera wasa ni nisondiya kono cogoya la, min kera sababu ye Afiriki ntolatanko nēnabo jekulu «KAFU» kuntigi Isa AYATU k'a jira ko «KUPUDAFIRIKI» labenni jamana fila kono nōgōnfe, fen numan don. Isa AYATU ko Gana ni Nizeriya y'u son hakili numan na ka jamanaw dème «KUPUDAFIRIKI» labenni na, se bëre te minnu ye. A y'a jira kunnafonidilaw la kobi, jamana 10 dōron de be Afiriki, minnu be se ka «KUPUDAFIRIKI» ntolatanw laben u danna, k'a soro u ni jamana were ma je. A ko ni kow dun tor'o cogo la, «KUPUDAFIRIKI» laban be mununmunun o jamana 10 dōron ni nōgōn ce. O dun te balon kanubaga si sago ye. «KAFU» nēmogoba Isa AYATU k'a m'a fo jamana kelen ka «KUPUDAFIRIKI» labenni ka dabila, nka se te jamana minnu ye, olu ka se k'u fanga fara nōgōn kan, walasa k'u kunkorota ni farafinna tulonba in ye. Hakililajigin na jamana 16 minnu ye «KUPUDAFIRIKI» tanko 22 nan labenni janjo ke Gana ni Nizeriya, olu y'u ka kubew k'e kuluw kono nin cogo la :

Kulufoloye: Ganini Kameruni ni Kodiware ni Togo y'u ka kuwabaw ke Akara



Oroberi Songi

dugu kono.

Kulu filanan : Afiriki Worodugu ni Gabon ni Alizeri ni Kongo-Kinsasa dagayoro tun ye Kumasi dugu ye.

Kulu sabanan : Misirajamana ni Zanbi ni Burukina Faso ni Senegali y'u ka kuwabaw ke Kano dugu kono.

Kulu naaninan : Nizeriya ni Maroku ni Tinizini Kongo-Baraza ntolatanjanaw tun be Lagosi dugu kono.

Nin ekipu 16 ye nōgōn sen be kelen-kelen «KUPUDAFIRIKI» kubew ma, fo ka n'a to to Nizeriya ni Kameruni ye. O nana fila ye nōgōn soro Nizeriya faaba Lagosi farikolo najaoye togo bolenba la min be wele ko «SURULERE». Balon sanga 26 nan waati Eto ye Nizeriya je lakari ni Kameruni ka bifoloye. NBoma ye kuru kelen far'o kan sanga 31 nan. «SURULERE» farikolo najaoye sumana iko sangabonda. Nizeriyakaw konorofilia. Nka bolontan kufolosanga 45 nan k'a be dafa yoro min na, Shukuwu ye 1 be Kameruni ka biw la.

+ 31 12

## TULON

Nin desen fila dilanbaga y'a dab'a kama, ka fili 10 k'u la. A'y'olu nini.



1 - Wesi karo kelen 2 - Ce tulio kelen 3 - Kogo min be nūmāne 4 - Sirafara min be nūmāne 5 - Kuli min be dogodogo la 6 - So sisibzys 7 - Biijju diblien minnu be kinifre 8 - Barrikon min daleen don nūmāne 9 - Wesi kuen 10 - Jiritunin min be dogodogo la kinifre.

jaabi

## KUPUDAFIRIKI kunbenw jaabiw

Kulu folo :

Gana ni Kameruni : bi 1 ni bi 1  
Kodiwari ni Togo : bi 1 ni bi 1  
Gana ni Togo : bi 2 ni bi 0  
Kameruni ni Kodiwari : bi 3 ni bi 0  
Gana ni Kodiwari : bi 0 ni bi 2  
Kameruni ni Togo : bi 0 ni bi 1

Kulu filan :

Afiriки worodugu ni Gabon : bi 3 ni bi 1  
Alizeri ni Kongo - Kinsasa : bi 0 ni bi 0  
Afiriки worodugu ni Kongo - Kinsasa : bi 1 ni bi 0  
Alizeri ni Gabon : bi 3 ni bi 1  
Alizeri ni Afiriки worodugu : bi 1 ni bi 1  
Kongo - Kinsasa ni Gabon : bi 0 ni bi 0

Kulu sabanan :

Misirajamana ni Zanbi : bi 2 ni bi 0  
Senegali ni Burukina Faso : bi 3 ni bi 1  
Misirajamana ni Senegali : bi 1 ni bi 0  
Zanbi ni Burukina Faso : bi 1 ni bi 1  
Misirajamana ni Burukina Faso : bi 4 ni bi 2  
Senegali ni Zanbi : bi 2 ni bi 2

Kulu naaninan :

Nizeriya ni Tinizi : bi 4 ni bi 2  
Maroku ni Kongo Baraza : bi 1 ni bi 0  
Maroku ni Tinizi : bi 0 ni bi 0  
Nizeriya ni Kongo Baraza : bi 0 ni bi 0  
Tinizi ni Kongo Baraza : bi 1 ni bi 0  
Nizeriya ni Maroku : bi 2 ni bi 0

Qana naani latomoni kunbenw :

Kameruni ni Alizeri : bi 2 ni bi 1  
Afiriки worodugu ni Gana : bi 1 ni bi 0  
Misirajamana ni Tinizi : bi 0 ni bi 1  
Nizeriya ni Senegal : bi 2 ni bi 1  
(dofarankan kofe)

Qana fili latomoni kunbenw :

Kameruni ni Tinizi : bi 3 ni bi 0  
Nizeriya ni Afiriки worodugu : bi 2 ni bi 0

Qana sabanan ni naaninan boqonna kunben :

Afiriки Worodugu ni Tinizi : bi 2 ni bi 2, waati bolodalen kono. Nka Afiriки Worodugu ye se soro ni penaliti 4 bi donni ye, k'a soro Tinizi danna 3 ma.

Qanaminenjana fila ka kunben :

Nizeriya ni Kameruni : bi 2 ni bi 2, waati bolodalen ni dofarkan waati kofe. Nka Kameruni ye Afiriки qanaya soro Nizeriya kan ni penaliti bi 4 ni 3 ye.

Qanawnan'usenennab, ka dusukura ta. Ntola kunfilanan damine ni sanga 2 doren ye Nizeriya nankamaden OKOSHA min be k'a jeniyorofin Faransi, o ya to metere 20 nognna hake la, ka ntola kerun Kameruni jola. «SURULERE» filelikejama mogo 60.000 bee panna nognfe, ka kule i ko dinewulito. Balontan nana nemajo bi 2 ni 2 la.

U ye nogn nege, ka nogn sama, ka nogn finge bo; ta ma wuli, sisi ma bo. On'a taa bee Nizeriya porokotora, bawo Eto ye bi 1 je ka balon gosi jojiri la. NBOMA fana jawuliko jugu ya yere fereke balon numan do la, foyi tun te min ni Nizeriya jo ce.

Dofarankan waati sanga 30 kera segen dan bee ye Nizeriya ni Kameruni bolo. U si ma se ka bi don min ke, balon jaratigebaga (aribitiri) nana balon da metere 11 na, u k'a tan k'a don fo do ka se do la. A be fo min ma ko penaliti, o de da diyara Kamerunikaw la, bawo useraka penaliti 4 donk'a soro Nizeriya qanaw donna 3 la.

Jatemin la, nin ya sine saba ye Kameruni ka «KUPUDAFIRIKI» yalon ka bo Nizeriya nekan. A digir'u la cogoya la fu'ya miirk'uta kera danga ye Kameruni koro. Kameruni ye san 2000 «KUPUDAFIRIKI» min ta nin ye, o b'a k'a sine sabanan ye. A jirala ko Kameruni ye Afiriки kelenya «KUPU» faga.

A ker'a halala ye. Afiriки balontanna qanaw bena nogn kunben san 2002 nogn dan min na Mali la, «KAFU» wajibiyalendonka «KUPUDAFIRIKI» kura da o hukumu kono. Afiriки balontanku enabo jekulu «KAFU» ka sariya la, jamana min mana

«KUPUDAFIRIKI» ta sine saba, o y'o kupu fagalen y'o jamana fe fo kura ka da.

A kolosira ko Nizeriya ni Kameruni ka nognsoro «KUPUDAFIRIKI» tanko 22nan qanaminenjanaw ka kene kan, o ma bali balon donbagaw la, bawo an be don min na, i ko bi, jamana fila ninnu jatelen don AFIRIKI ntlatannabaw fe. A ko kera laada latilen de ye. San 2000 KUPUDAFIRIKI bi dontaw ma Burukina Faso bosoan 1998. Nizeriya ni Gana «KUPUDAFIRIKI» bi donnenn ye 73, k'a soro Burukina ta kera 93 ye. Nka ceje ni balondon ni laben sira kan, san 2000 ye bee jigi fa. An be segin a kan, k'a wladonniya ko san 2002 «KUPUDAFIRIKI» janjo be ke Malila. A nognsenbo kunfobontolaw be tan jamana 42 ni nogn ce, san 2000 zuwenkalo ni zuluyekalo la. Ekipu qana 16 laban minnu ben'u kogo da nogn na an bara, fila donnendon olu la ka ban no ye san 2000 «KUPUDAFIRIKI» yalonbaga Kameruni ye ani san 2002 «KUPU» kunbenw labenjamana no ye Maliye.

**Basiriki TURE.**

"AMAP" kuntigi

Gawusu DARABO

Mali kanw kunnafonisbenw  
baarada kuntigi

Qanze Samake

**Kibaru**

BP : 24 Telefoni: 21-21-04

Kibaru Bugufiye Bozola

Bamako -Mali

Dilanbagaw ni sebenbagaw kuntigi

Basiriki Ture

Sebenbagaw kuntigi

Badama Dukure

Labugunyoro: Kibaru gafedilar baarada

Bolen Hake 16 000